

ZAPISNIK

**sa vanredne sjednice Gradskog vijeća održane dana 04.04.2019.godine u 15:00 sati u
Gradskoj vijećnici Grada Bihaća**

Predsjedavajući otvara sjednicu i konstatuje da sjednici prisustvuje 29 vijećnika. Vijećnik Nedin Dedić opravdao je odsustvo sa sjednice Vijeća.

Na vanrednu sjednicu pozvani su: Zerina Mulabdić, direktorica JU „Zavod za javno zdravstvo“ Bihać, Samir Alić, načelnik Policijske uprave Bihać, Adnan Alagić, ministar Ministarstva za prostorno uređenje i građenje USK-a, ispred Vlade Unsko-sanskog Kantona i Dražan Rozić, predstavnik Međunarodne organizacije za migracije - IOM.

Predsjedavajući za današnju vanrednu sjednicu predlaže slijedeći:

Dnevni red

Humanitarno – sigurnosna situacija na području grada Bihaća vezana za migratsku krizu.

Predsjedavajući ,

u uvodnom izlaganju naglasio je da je vanredna sjednica inicirana od strane Kluba nezavisnih vijećnika „Pomak“ i vijećnika Kluba SDA, Nijaza Malkoča, a inicijative je Kolegij GV jednoglasno prihvatio.

Također, naveo je da je GV dostavljena Peticija građana grada Bihaća vezana za migrantsku krizu u Bihaću u kojoj se zahtijeva hitno izmještanje migranata iz urbanog i naseljenog dijela grada Bihaća, a koju je svojim potpisom podržalo preko 3000 građana. Peticija je upućena svim vijećnicima, Gradonačelniku, svim relevantnim federalnim organima vlasti, Međunarodnoj organizaciji za migracije u BiH, Skupštini USK-a, MUP USK-a i JP Željeznice FBiH.

Obzirom da je Peticija podnesena u skladu sa članom 127. Statuta grada Bihaća, Kolegij GV je istu razmatrao i donesen je zaključak da se na današnjoj vanrednoj sjednici sadržaj prezentira javnosti u cilju zauzimanja konačnog stava po iznesenim zahtjevima.

Predsjedavajući otvara raspravu po Dnevnom redu te poziva :

Samira Alića, načelnika Policijske uprave Bihać, da informira vijećnike i javnost o javnom redu i miru na području grada Bihaća.

U svom obraćanju načelnik Policijske uprave Bihać istakao je da niko nije tražio suglasnost od MUP-a, a ni mišljenje vezano za lokacije za smještaj migranata.

Mnogo je ljudi pristiglo i teško ih je kontrolisati. Osim toga, evidentirana su svakodnevna narušavanja javnog reda i mira, te su prisutne svakodnevne intervencije policije u privremenom migrantskom centru „Bira“, a i u samom gradu.

„Bez obzira što imamo policijske patrole u Bosanskoj Otoci, koje sprečavaju ulazak migranata na područje USK-a, svakodnevno u Bihać dođe novih stotinu i pedeset migranata. Veliki problem predstavlja to što se ne mogu kontrolisati migranti u privatnim objektima u gradu Bihaću. Ako u ovom broju nastave dolaziti moglo bi se desiti da cijeli grad postane migrantski centar.

Što se tiče krivičnih djela od strane migranata na području Bihaća, u prva tri mjeseca, njihov broj je znatno smanjen u odnosu na prošlu godinu. Mi imamo problema sa efikasnošću procesuiranju krivičnih djela koja šaljemo sudu za prekršaje. Svi ti postupci još uvijek traju, što znači da ni jedan migrant neće odgovarati za počinjene protivpravne radnje jer dok slučaj bude priveden kraju proći će godina dana, tada će počinioc biti van Bihaća. Mi bi trebali malo ubrzati ovaj postupak kako migranti koji su problematični ne bi shvatili da mogu da rade šta hoće.“

Zerina Mulabdić direktorica JU „Zavod za javno zdravstvo“ Bihać

U svom izlaganju dala je ocjenu higijensko-zdravstvenog stanja u privremenim migracionim centrima, te je istakla da će se epidemiološka situacija usložnjavati sa novim prilivom migranata.

Izražava zabrinutost za ovo što se dešava jer ispada da je migrantska kriza vezana za zdravstvenu zaštitu pala na pleća JU „Zavoda za javno zdravstvo, bolnice i Crvenog križa Bihaća.

Naglašava, da među migrantima nema oboljena koja već nisu poznata lokalnom stanovništvu, ali je povećan broj oboljelih od svraba i tuberkuloze, što je direktno vezano za uslove u kojima migranti borave. Privremeni migracioni centri ne ispunjavaju propisane higijenske uslove. Rješenje je u trijaži, odnosno odvajanju bolesnih od zdravih migranata. Smatra da ne treba stvarati paniku među građanima, ali trebamo biti oprezni i zabrinuti za ono što nam se dešava. Kako bi se moglo pratiti zdravstveno stanje migranata i vršiti nadzor nad njima, morali bi biti smješteni na jednom mjestu ili smješteni u dva – tri centra van grada Bihaća.

Dražan Rozić, šef operacija IOM-a

Na početku izlaganja istakao je da se IOM u potpunosti slaže s odlukom o izmještanju migranata iz centra grada u koliko je Gradsko vijeće donese, ali i bilo kojom drugom odlukom koju donese Gradsko vijeće ili državni organ a koje su vezane za izmještanje i smještaj migranata.

Naglašava da je ova sjednica zakazana zbog toga što možemo doći u još težu situaciju i stoga što želimo da upravljamo migrantskom krizom.

U svom daljnjem izlaganju istakao je sljedeće:

„Mi zajedno moramo raditi u interesu građana grada Bihaća, ali u tom cilju se moramo riješiti politike i politikantskih interesa te nastaviti da upravljamo migrantskom krizom ili ćemo, u protivnom, imati haos na ulicama Bihaća.

U koliko se donese odluka o iseljavanju migranata postavlja se pitanje, gdje ćemo ih tada smjestiti. Obaveza je i lokalne zajednice, ali na prvom mjestu federalnih i državnih organa da iznađu adekvatan prostor u koji bi IOM izmjestio migrante iz urbane sredine ili pomogao da se izgradi migracioni centar sa neophodnom infrastrukturom, a koji bi i u buduće IOM finansirao.

U raspravi su uzeli učešće vijećnici: Adis Šušnjar, Sej Ramić, Armin Amidžić, Muhamed Čavkunović, Irman Alijagić, Hasan Keškić, Amra Čehajić, u ime Kluba SDA predložila je zaključke, Rusmira Konjević, Davor Župa, Asmir Budimlić, Dinko Bećirspahić, Hilmo Kozlica, Adnan Habibija, Edin Felić, Almir Budimlić, Armin Amidžić, Refik Imširović, Zulfikar Handukić, Ahmed Fatkić, Sanel Havić i Nijaz Malkoč, koji su isticali da je najveći problem za građane grada Bihaća što se mladi i nepoznati ljudi nekontrolisano kreću gradom, a što nije prakse u drugim zemljama Evropske unije, niti u zemljama u okruženju kroz koje prolaze te što do danas nije utvrđen tačan broj migranata koji su na području USK-a, odnosno grada Bihaća. Također je istaknuto, a što potvrđuje izvještaj Policijske uprave Bihać, da se svakodnevno dešavaju problemi sa migrantima kao što su krađe, napadi i otuđenje lične imovine građana. Svi smo svjedoci da su vrlo često prisutni sukobi i među migrantima.

Vijećnici su jednoglasni u stavu da treba naći lokaciju van grada u koju bi se privremeno smjestili migranti, što osigurava veću kontrolu nad migrantima, a isto tako treba zabraniti vlasnicima privatnih objekata da izdaju smještaj licima koja nemaju lična dokumenta, niti se može utvrditi njihov identitet. Obaveza je nadležnih državnih organa da izvrše kontrolu izdavanja privatnih objekata za smještaj migranata, kako bi se mogao utvrditi njihov identitet i njihov broj.

Vijećnici su istakli da je najveći problem što je 80% muške populacije među migrantima, a veoma mali broj je žena i djece. Na samom početku dolaska migranata trebalo je više pažnje posvetiti razlikama između migranata koji dolaze iz ratom zahvaćenih područja i migranata koji su iz ekonomskih razloga, opravdano ili ne, napustili svoje kuće i krenuli ka Evropskoj Uniji. Za većinu tih ljudi nije nam poznato ni ko su, ni što su, ni šta im je cilj ili zadatak. Bez obzira na sve probleme koje imaju migranti i koji bezuspješno pokušavaju doći do EU, vijećnicima grada Bihaća su, na prvom mjestu, građani Bihaća i poduzeće se sve raspoložive mjere kako bi se građani zaštitili od svega negativnog što je prouzrokovala migrantska kriza.

Vijećnici su inzistirali da se bolesni migranti izdvoje i stave pod kontrolu kako bi i zdravstveno zaštili građane od bolesti koje su ustanovljene kod pojedinih migranata.

Vijećnici, također, smatraju da će migrantska kriza i nekontrolisani dolazak migranata na područje grada Bihaća negativno utjecati na nadolazeću turističku sezonu, obzirom da mnogi turisti otkazuju rezervacije za Grad Bihać zbog svoje lične sigurnosti.

Gradonačelnik Šuhret Fazlić

Na početku izlaganja istakao je da je na njegov prijedlog, a kojeg su prihvatili svi vijećnici u Gradskom vijeću, zakazana današnja vanredna sjednica posvećena problemima vezanim za migrantsku krizu u Bihaću. Također je naglasio da podržava Peticiju građana u cijelosti.

„ Mi moramo biti svjesni da migrante nismo zvali da dođu kod nas, sami su došli i stvorili nam probleme. Glavni problem je to što je istočna granica otvorena i što nadležni organi ne rade svoj posao na zaštiti granice. Drago mi je da vidim danas na koga mogu sve računati u buduće, jer će ova kriza trajati dugo i trebat će mi podrška sviju. Danas imam priliku da se uvjerim u to kakve su namjere pojedinaca. Podržavam sva dosadašnja izlaganja i sve iznesene prijedloge, primjedbe i zahtjeve vijećnika, ali se ne mogu složiti sa zahtjevom da se migrantima ograniči kretanje. Za takvo što ne postoje mehanizmi jer mi na području grada imamo privremene migrantske cente.

Da bi se uvelo više reda, a i sigurnosti za građane, tražim da Služba za strance evidentira sve migrante koji se kreću Unsko - sanskim kantonom, te da donesu „kućni red“ o njihovom ponašanju u privremenim migrantskim centrima. Također, tražim i pojačan nadzor policije, pogotovo u naseljima gdje su migranti smješteni u privatnom smještaju, te da se evidentiraju svi objekti u kojima su smješteni. Najbitniji je sigurnosni aspekt za građane Bihaća.

Mi smo svi zaboravili kakva je bila situacija u početku dolaska migranata, da su ležali po ulicama i parkovima, napuštenim objektima i ispred Islamskog pedagoškog centra. Tada nismo imali drugo rješenje već ih skloniti sa ulice. U tom momentu vidio sam jedino rješenje da ih smjestim privremeno u Đački dom „Borići“. Ako sam kriv za to, ima tužilaštvo neka radi svoj posao. Ali onda su i građani krivi jer su donosili hranu, odjeću, nosili su se kurbanim tim ljudima. Mi smo pokazali solidarnost, ali nam se sve to razbilo od glavu. Smatram da krizom moraju upravljati sa vrha države i to je njihov posao a ne lokana zajednica na koju je pao sav teret. Ja sam za to da se pod hitno zatvore granice preko kojih migranti dolaze, odnosno da se stave pod kontrolu. Također sam za to i da se pod hitno ograniči broj migranata u USK-u, odnosno Bihaću, te da se prihvatni centri izmjeste van grada.

Podatak da SIPA vodi 40 slučajeva trgovine ljudima, a samo 4 slučaja nelegalnog ulaska migranata dovoljno govori o radu državnih institucija.

Prihvatljiv mi je prijedlog vijećnika Keškića, da se treba razmisliti o formiranju Ureda za migrante koji bi imao stalni kontakt sa građanima u vezi migrantske krize.“

Na kraju svoje diskusije je istakao da su se migranti mogli smjestiti i u kasarne, kako su pojedini građani tražili, međutim ministru sigurnosti, Mektiću, je rekao da mi ne želimo migrantske centre, nego da se država i nadležne službe pobrinu i formiraju jedan migrantski centar van gradskih područja. Također, država pod hitno mora donijeti Plan upravljanja migrantskom krizom ili ćemo imati za dva- tri mjeseca ponovno šatore po gradu.

Adnan Alagić, ministar, predstavnik Vlade Unsko-sanskog Kantona

Podržao je sve prijedloge vijećnika i gradonačelnika, te je upoznao prisutne da će se uskoro sastati Skupština kantona i da će raspravljati na temu migrantske krize u USK-u.

Činjenica je da su ovo gorući problemi grada Bihaća i što prije treba iznaći lokaciju za privremeni prihvatni centar kako bi se migranti mogli izmjestiti van grada.

Na kraju izlaganja istakao je da gradonačelnik i vijećnici ne snose nikakvu odgovornost kad je u pitanju migrantska kriza i smještaj migranata obzirom da je to obaveza i odgovornost državnih organa.

Nakon provedenih rasprava, predsjedavajući poziva predsjednike Klubova i Gradonačelnika da usaglase svoje stavove po iznijetim zaključcima iz rasprave te predlože jedinstvene zaključke sa današnje vanredne sjednice GV.

Također, traži da se pri tome vodi računa o stavovima i zaključcima koje su iznijeli građani grada Bihaća u svojoj Peticiji.

Nakon usaglašavanja stavova Klubova vijećnika i pojedinačnih zaključaka vijećnika, predsjedavajući iznosi sljedeće:

ZAKLJUČKE

1. Kolegij Gradskog vijeća će pored redovnog zasjedanja, minimalno jednom mjesečno zasjedati, posebno na temu migrantske krize.
2. Gradsko vijeće i Gradonačelnik Grada Bihaća traže da se Predsjedništvo BiH, Vijeće ministara BiH, Vlada Federacije BiH i Vlada RS hitno uključe u rješavanje migrantske krize u Unsko-sanskom kantonu, da u potpunosti zatvore istočnu granicu BiH i zabrane transport migranata i izbjeglica kroz BiH prema Unsko-sanskom kantonu, posebno putem željezničkog saobraćaja.
3. Gradsko vijeće i Gradonačelnik Grada Bihaća od Vijeća ministara BiH i Ministarstva sigurnosti BiH zahtijevaju hitno donošenje strategije upravljanja migrantskom rutom kroz BiH kako bi se teret ravnomjerno rasporedio unutar BiH i smanjio direktan pritisak na Bihać, te kojom bi se propisale procedure o transportu migranata i izbjeglica, koji iznad raspoloživih kapaciteta dođu na područje Unsko-sanskog kantona, u druge centre u BiH.

4. Od Vlade Republike Srpske i Ministarstva unutrašnjih poslova RS-a tražimo da u koordinaciji sa Ministarstvom sigurnosti BiH i Graničnom policijom BiH, postigne veći angažman u zaštiti državne granice između BiH i Srbije i zabrane transporta migranata preko RS do USK-a.
5. Od Ministarstva vanjskih poslova BiH zahtijevamo da reaguje prema institucijama Republike Hrvatske i pokrene aktivnosti u vezi postupaka Granične policije Republike Hrvatske koja vraća migrante i izbjeglice na područje Unsko-sanskog kantona na nelegalan način. Gradsko vijeće traži od ambasadora zemalja iz kojih dolaze migranti i izbjeglice da hitno posjete Grad Bihać i da se aktivno uključe u rješavanje ovog problema.
6. Gradsko vijeće i Gradonačelnik Grada Bihaća zahtijevaju od svih izabраниh zvaničnika u državnim i federalnim organima sa područja USK-a, bez obzira na stranačku pripadnost, da iniciraju vanredne sjednice u Parlamentu BiH i Parlamentu Federacije BiH na temu migrantske krize u Bihaću, te konstantno insistiraju na ispunjenju prethodnih zaključaka.
7. Trenutni kapaciteti za privremeni smještaj migranta i izbjeglica u Gradu Bihaću je 2.000 osoba i Grad Bihać ne može prihvatiti veći broj migranata i izbjeglica. U skladu s tim, Gradsko vijeće Grada Bihaća je izričito da se bez saglasnosti Gradskog vijeća Grada Bihaća ne smiju otvarati novi smještajni kapaciteti na području grada Bihaća, niti proširivati postojeći.
8. Gradsko vijeće i Gradonačelnik Grada Bihaća zahtijevaju od Ministarstva sigurnosti BiH da odmah preuzme upravljanje privremenim prihvatnim centrima, donese kućni red i ograniči kretanje migranta i izbjeglica na području grada Bihaća.
9. Gradsko vijeće i Gradonačelnik Grada Bihaća od Ministarstva-unutrašnjih poslova Unsko-sanskog kantona zahtijevaju konstantno prisustvo policijskih službenika na ključnim lokacijama u centru grada Bihaća i na drugim lokacijama gdje je povećana koncentracija migranata kako bi se smanjio pritisak migranata na tim lokacijama.
10. Gradsko vijeće i Gradonačelnik Grada Bihaća traži od nadležne kantonalne inspekcije da vrši pojačan inspekcijski nadzor privatnih objekata koji služe za iznajmljivanje i boravak osoba, a zbog zdravstveno-epidemioloških rizika.
11. Poslovna zgrada, bivša tvornica "Bira", ne posjeduje nikakvu saglasnost Gradskog vijeća, niti Gradonačelnika da služi kao prihvatni centar za migrante i izbjeglice. S tim u vezi Gradsko vijeće Grada Bihaća zahtijeva da se migranti i izbjeglice iz tog privremenog centra u roku od 3 (tri) mjeseca izmjestе van naseljenog područja grada Bihaća, odnosno da se taj centar zatvori.
12. Gradsko vijeće je stava da zgrada bivšeg Đačkog doma u Borićima može služiti isključivo za smještaj porodica sa djecom, u skladu sa kapacitetom objekta (434 osobe), pod uvjetom da dođe do realizacije prethodnog zaključka.

13. Ukoliko Zaključak broj 11 (jedanaest) ne bude ispoštovan u datom roku, Gradonačelnik Grada Bihaća dužan je zatražiti od nadležne kantonalne inspekcije inspekcijски nadzor nad korištenjem poslovne zgrade "Bira" i poduzimanje zakonskih mjera (pečaćenje objekta).
14. Gradsko vijeće traži od Gradonačelnika da u saradnji sa Službom za imovinsko-pravne poslove hitno ponudi lokaciju za privremeni migracioni centar koji će se nalaziti van naseljenog područja grada Bihaća. Privremeni migracioni centar mora formirati Ministarstvo sigurnosti BiH i bit će izgrađen u skladu sa međunarodnim standardima, te vodeći računa o svim međunarodnim konvencijama o ljudskim pravima, pravima djeteta, te Konvenciji UN o statusu migranata i izbjeglica.
15. Gradsko vijeće u cilju osiguranja socijalne kohezije i sprečavanja negativne percepcije građana Bihaća prema drugim gradovima u BiH, te migrantima i izbjeglicama otvoreno osuđuje govor mržnje, kontroverzne članke u medijima i na društvenim mrežama. Tražimo da se odmah prestane sa govorom mržnje i prikazivanja grada Bihaća u negativnom kontekstu.
16. Gradsko vijeće nalaže Gradonačelniku da imenuje ured u okviru organa uprave koji će biti nadležan za pitanja migranata i izbjeglica. Formirani ured za pitanja migranata i izbjeglica će utvrditi glavne aktere koji će raditi na pitanjima migranata i izbjeglica na području grada Bihaća i napraviti jasan i pravilan mehanizam za koordinaciju i razmjenu informacija. Imenovanje ovakvog ureda je preporuka Organization for Security and Co-operation in Europe, Mission to Bosnia and Herzegovina iz 2018. godine (OSCE).
17. Gradsko vijeće traži od Gradonačelnika da gradskim vijećnicima dostavi spisak svih realiziranih projekata na području grada Bihaća, te informaciju ko je odredio prioritete, kakvi su ugovorni uslovi ovih infrastrukturnih ulaganja, te kolika je zastupljenost lokalnih poduzeća u realizaciji poslova. Gradsko vijeće traži od Gradonačelnika da gradskim vijećnicima dostavi indikatore učinka realiziranih projekata.
18. Gradsko vijeće nalaže Gradonačelniku da svi eventualno budući ugovori između Međunarodne organizacije za migracije (IOM) i Grada Bihaća, odnosno institucija i poduzeća čiji je osnivač Gradsko vijeće moraju prethodno dobiti saglasnost Gradskog vijeća Bihać.

Predložene zaključke predsjedavajući daje na glasanje.

Zaključci su usvojeni jednoglasno.

Predsjedavajući je na kraju sjednice još jednom naglasio da su u usvojenim zaključcima inkorporirani zaključci većine u Vijeću, Kluba SDA, građana iznesenih u Peticiji, te ostalih vijećnika iznesenih tokom rasprave.

Obzirom da je jedan dio usvojenih zaključaka imperativnog karaktera ili sadrži rok za postupanje, od državnih i međunarodnih organa i institucija GV zahtijeva da dostave informacije o poduzetim mjerama i aktivnostima, o čemu će javnost biti informirana putem Kolegija GV.

Također, obavijestio je javnost da će Skupština USK-a zakazati vanrednu sjednicu po istom dnevnom redu, a više poslanika različitih političkih subjekata podnijeli su zahtjev za održavanje vanredne sjednice Parlamenta FBiH, vezanu za migrantsku krizu.

Sjednica Gradskog vijeća završena je u 20:15 minuta

Sekretar Gradskog vijeća
Zlata Ibrahimpašić,dipl.pravnik

Predsjedavajući Gradskog vijeća
Davor Župa